

1 Tesalonika

Sasuri Paulus ka èci hia dhèu sarani ètu kota Tesalonika

Lii maho'o nèti Paulus si

¹ Lii maho'o nèti ja'a Paulus, dènge angalai ja'a Silas dènge Timotius.

Sasuri ne, ji'i pa'adhu hia miu dhèu sarani aa'i-aa'i mi ètu kota Tesalonika. Miu ka dhu pama'ète mere le, ho madhutu Ama Lamatua èdhi, dènge Kètu èdhi, Yesus Kristus.

Ji'i manèngi, sèna ka Ama Lamatua pad'elo d'ara hua iia Na hia miu, ho miu mamuri dènge mera-milu.✧

*Paulus manèngi makasi lula dhèu Tesalonika
parcaya taruu*

² Ji'i loe boe manèngi makasi mi Ama Lamatua, lula parcaya miu. Mèu-mèda ji'i sabaj'a hia miu aa'i-aa'i mi.

³ Ji'i sanèd'e sasab'a dhu miu sab'a, lula miu parcaya Ama Lamatua, aa sue Ne. Miu loe boe nèti j'ara èèna, lula era sarai miu ka Lamatua Yesus. Ji'i loe boe kahèi ngèti j'ara se'e aa'i-aa'i asa katanga madha Ama Lamatua.

⁴ A'ari aa'i-aa'i! Ji'i nge'a Ama Lamatua sue miu. Nèti èèna ka, Na hag'e nare miu j'aj'i dhèu Nèngu.

✧ **1:1** Lii Lolo nèti Dhèu Pajuu-paleha 17:1

⁵ Uru èèna, lod'o ji'i dhiu asa Tesalonika, ji'i peka-padhai dènge miu Lii Lolo Be'a Ama Lamatua. Lod'o èèna, miu pasa dhilu paie-iie ho nanene lii padhai lii ji'i. Miu mesa boe dhoka nanene lii ji'i di, te ngaa miu mèdehi unu mi kahèi koasa Ama Lamatua nèti Roh Na dhu Mola-Mèci èèna. J'ara èèna ka dhu tao miu tare'a-re'a sèmi mere Lii Lolo Be'a èèna. Lod'o èèna, miu mèdehi unu mi j'ara mamuri ji'i dhu tasa mera mia, sèna ka me'a tare'a-re'a, j'ara-j'ara Lamatua.

⁶ Lula miu pama'ète mere le ho madhutu dad'èi Lamatua, nèti èèna ka miu mamuri madhutu tatao ji'i, aa madhutu j'ara mamuri Lamatua Yesus kahèi. Te ngaa lod'o miu heka sèmi mere Lii Lolo Be'a èèna, abhu dhèu dhu pasusa miu. Masi ka sèmi èèna, te ngaa d'ara miu kalau boe-karèto boe, lula Roh Lamatua dhu Mola-Mèci pakarej'e d'ara miu.✧

⁷ Dènge sèmi èèna, miu pad'elo j'ara hia dhèu parcaya aa'i-aa'i ètu propensi Makedonia dènge propensi Akaya.

⁸ Mesa boe ètu sèi di. Te Lii Lolo Be'a Lamatua dhu pale-lème le Tesalonika nèti miu se'e ka toke mia-mia. De ji'i peka ngaa hari, lula dhèu aa'i-aa'i tadèngi le lalèka miu mi Lamatua.

⁹ Ètu mia-mia dhèu palolo, peka na, miu uru na sèmi mere ji'i dènge d'ara kateme. Ka miu core eele mèdha-mèdha sogo-tagu mi, hèia mai madhutu Lamatua dhu tare'a-re'a. Te miu me'a le, na, Lamatua èèna nuka Ama Lamatua dhu mamuri. Nèti èèna ka, èdhi aa'i-aa'i ti madhutu Ne.

✧ **1:6** Lii Lolo nèti Dhèu Pajuu-paleha 17:5-9

¹⁰ Rèngu palolo kahèi, na, miu tatae mamai Ana Ama Lamatua nèti sorga, nuka Yesus. Uru èèna dhèu pamadhe Ne, te ngaa Ama Lamatua ka dhu pamamuri hari Ne. Lod'o Ama Lamatua huku dhèu rai-haha ne, na, Lamatua Yesus ka dhu pakaj'èu èdhi nèti nanasa Ama Lamatua.

2

Paulus sanèd'e sasab'a na ètu Tesalonika

¹ A'ari aa'i-aa'i! Miu aa'i-aa'i mi me'a le lod'o ji'i dhiu sab'a ètu Tesalonika, èi kabhèsu ji'i suti boe iia d'ara.

² Miu sanèd'e kahèi lod'o ji'i dhiu mèka asa Tesalonika, dhèu nèti kota Pilipi dhu tao le pasusa dènge paj'èra ji'i. Te ngaa lula Lamatua pa'èra d'ara ji'i, ka ji'i bani lole Lii Lolo Be'a Lamatua dènge miu, masi ka dhèu ae dhu pamusu dènge ji'i.✧

³ Lod'o èèna, ji'i ngèti Lii Lolo Be'a hia miu asa Tesalonika, ngèti boe lii aj'a-nori dhu koe-kapengo. Te ji'i dhiu tao boe pagoa dènge pakapod'e-kabèli miu.

⁴ Aad'o! Uru èèna ji'i dhiu dènge d'ara mola. Ama Lamatua mesa Na dhu paj'uj'u ji'i, ho ngèti Lii Lolo Be'a Na asa miu. Ji'i se neo boe pakarej'e d'ara dhèu rai-haha, te ngaa pakarej'e d'ara Lamatua, te Nèngu ka dhu patigi nèdhi d'ara ji'i, sèna ka ne'a, mola do koe.

⁵ Miu me'a kahèi, na, ji'i se hèb'a mènysi boe, ngaa hari tenge leto ca doi sa nèti miu. Ama Lamatua dhu ne'a d'ara ji'i.

✧ **2:2** Lii Lolo nèti Dhèu Pajuu-paleha 16:19-24, 17:1-9

⁶ Sasab'a ji'i ne tenge boe lii koa-kad'iri nèti dhèu rai-haha, do nèti miu, aa nèti dhèu leo kara kahèi.

⁷ Ji'i se dhèu pajuu-paleha Kristus. Ji'i dènge hak kahèi, tao ngi'u sama sèmi dhèu aae-dhèu kapai, te ngaa ji'i ngo'o boe padedha iisi sèmi èèna. Lod'o sèra, ji'i tao ngi'u ji'i èci èèna ka dènge ana iiki ètu talora aae miu. Ji'i pad'elo sasue mi dedha miu kahèi, nuka sèmi ina dhu pasusu ana na.

⁸ Ji'i dhiu ho mesa boe dhoka ngèti Lii Lolo Be'a hia miu di, te ngaa ji'i soro iisi kateme aae kahèi, lula ji'i sue miu seli eele.

⁹ A'ari aa'i-aa'i! Ele boe miu sanèd'e era, ji'i sab'a dhu nge'a boe j'èra mèu-mèda, ho abhu unu mi nganga'a-nganginu. Te ji'i d'èi boe paj'èra miu lod'o ngèti Lii Lolo Be'a asa miu.

¹⁰ Miu mèdhi unu mi, sèmi èèna kahèi Ama Lamatua, ropa dhu ji'i bera-bera dènge miu aa'i-aa'i mi dhu parcaya le, ji'i mamuri dènge d'ara mola, dhu tao boe sala ngaa-ngaa.

¹¹ Miu me'a kahèi, ji'i lalau-lalo'o miu, èci èèna ka dènge ama matana ladhe-leru ana-ana na,

¹² nuka sèmi: pa'èra d'ara miu aa'i-aa'i mi, pasanèd'e dènge pamako miu sèna ka mamuri dhu mèci, ho pakarej'e d'ara Lamatua. Te Nèngu ka j'aj'i Dhèu Aae, dhu paroa le miu sèna ka j'aj'i ana kabarai Na, aa abhu pakab'ua bera-bera dènge Nèngu.

Lamatua sab'a ètu d'ara miu

¹³ Ji'i ma'ète boe manèngi makasi mi Ama Lamatua, lula lod'o miu tadèngi lii lolo nèti ji'i,

miu sèmi mere boe lii holo-nori nèti dhèu rai-haha, te ngaa Lii Holo-Nori èèna kapua na nèti Ama Lamatua. Nèngu unu Na ka dhu sab'a ètu d'ara miu dhèu parcaya.

14 A'ari aa'i-aa'i! Miu heka madhutu j'ara Lamatua kèna, te ngaa dhèu-dhèu miu pasusa le miu. De miu se abhu j'aj'èra èci èèna ka dènge dhèu parcaya ètu propensi Yudea, dhu dhèu Yahudi rèngu mesa ra paj'èra rèngu lula ra lèka Yesus Kristus.*

15 Abhu dhèu Yahudi dhu pusi-pahae boe dad'èi Ama Lamatua. Nèti èèna ka, ropa Ama Lamatua pua dhèu rèti lii padhai Na mai asa rèngu, ka rèngu paj'èra dènge hake pamadhe si. Ra pamadhe Lamatua Yesus dènge j'ara sèmi èèna kahèi. Limuri ne, ra tenge j'ara ho babèga eele ji'i kahèi. Rèngu pamusu dènge dhèu aa'i-aa'i ra, ka Ama Lamatua d'èi boe rèngu.*

16 Ngaa hari, ra tenge j'ara ae-ae sèna ka ji'i pakako ia ka Lii Lolo Be'a hia dhèu leo. Dhèu Yahudi se ro'o boe ho Lamatua pala-bagi mamuri hia dhèu leo kara kahèi. Dènge j'ara èèna ka, sasala rèngu sèmi tao udhu sa. Hèia Ama Lamatua nasa, ka huku si.

Paulus neo paraga hari dènge dhèu sarani ètu Tesalonika

17 A'ari aa'i-aa'i! Masi ka èdhi pakaj'èu, te ngaa pakaj'èu boe ètu d'ara. Ji'i tenge-tenge j'ara, ho ladhe abhu lod'o dhu taleo, ji'i dhiu hari pa'asu-pareo dènge miu, te d'ara ji'i neo ae le.

* 2:14 Lii Lolo nèti Dhèu Pajuu-paleha 17:5 * 2:15 Lii Lolo nèti Dhèu Pajuu-paleha 9:23,29, 13:45,50, 14:2,5,19, 17:5,13, 18:12

¹⁸ Ja'a mesa ku neo ae le kahèi dhiu pangad'o dènge miu, te ngaa dhèu aae nidhu loe boe bhabhae ja'a.

¹⁹ Miu me'a, nga tao ka ji'i neo dhiu paraga dènge miu, sina ma? Lula ji'i maena miu. Miu ka dhu pakarej'e dènge pa'adhu d'ara ji'i. Ladhe miu aad'o, cee hari ka dhu kèpe pa'èra kolongara Lamatua Yesus! Ladhe Lamatua lèpa hari mai, d'ara ji'i taleo, lula miu se'e ka.

²⁰ Mema tare'a! Miu se'e se ka dhu pakab'ua sasab'a ji'i aa pataleo d'ara ji'i.

3

Paulus pama'ète sèna ka Timotius la'e asa Tesalonika

¹⁻² Sèna ka miu me'a, ca hari ni ji'i kako tèke eele miu èèna, madhutu boe dad'èi ji'i. Ji'i neo ae le dhiu paraga dènge miu, te ngaa bisa mèka. Lula ji'i ngo'o heka mate panèbhu, hèia ji'i pama'ète le ho pua Timotius dhiu. Te ngaa ja'a dènge Silas pea ètu kota Atena. Timotius ne a'ari ji'i. Nèngu ne angalai ji'i ètu d'ara sasab'ala'a, dhu bera-bera pakako Lii Lolo Be'a Lamatua Yesus. Ji'i pua na dhiu, ho na aj'a miu aa pa'èra d'ara miu, sèna ka miu asa parcaya èra Ama Lamatua.☆

³ Dènge j'ara ne'e, ladhe miu paraga dènge sasusa, d'ara miu roe boe. Kèpe pa'èra-èra lalèka miu. Te miu me'a le, dhèu cee dhu parcaya Kristus, tatu na paraga dènge j'aj'èra.

☆ **3:1-2** Lii Lolo nèti Dhèu Pajuu-paleha 17:15

4 Ca hari ni, lod'o ji'i dènge miu era, ji'i pasanèd'e le miu, peka na, dhèu cee dhu parcaya Lamatua Yesus, bèli-camèd'a paraga dènge rupa-rupa sasusa. Limuri ne j'aj'i le, si!

5 Lula ja'a susa titu kèna nèti j'aj'èra miu se'e ka, nèti èèna ka ja'a pua Timotius dhiu asa Tesalonika, ho ji'i nge'a mèu kèna, miu parcaya era Lamatua, do aad'o. Te ja'a mage-mage, dhèu aae nidhu dadugu miu, ho miu soro kabodho mi Lamatua. Ladhe j'aj'i ka sèmi èèna, sasab'a ji'i uru sèra, ele iie d'ara!

Timotius lèpa nèti Tesalonika

6 Lai-lai ne, Timotius lèpa hari mai nèti Tesalonika. Ka nèti lii dhu pakarej'e d'ara ji'i. Na lolo, na, miu parcaya Kristus era, aa miu èci pasue dènge èci. Na peka kahèi, na, miu ngee ji'i sèmi mia dhu ji'i sanèd'e miu kahèi.*

7-8 A'ari aa'i-aa'i! Masi ka ètu ne'e ji'i ako rasa bia, lula abhu susa ae nèti mia-mia, te ngaa ropa tadèngi lii lolo Timotius, ka d'ara ji'i tare'a-re'a abhu karej'e. Lula limuri ne ji'i nge'a le miu parcaya Lamatua era.

Paulus sabaj'a hia dhèu sarani ètu Tesalonika

9 De ji'i manèngi makasi ae-ae mi Lamatua dènge d'ara dhu karej'e titu kèna, lula miu madhutu Ne taruu.

10 Mèu-mèda ji'i loe boe sabaj'a sèna ka catèka sa èdhi paraga hari. Ji'i neo aj'a miu sèna ka pamèci d'ara miu ètu j'ara mamuri Lamatua.

* 3:6 Lii Lolo nèti Dhèu Pajuu-paleha 18:5

¹¹ Ji'i sanao sèna ka Ama Lamatua èdhi, aa Kètu èdhi, Yesus Kristus, bhoke j'ara sèna ka ji'i dhiu paraga hari dènge miu.

¹² Ji'i manèngi sèna ka Lamatua hia miu asa pasue risi eele hari. Nuka sèmi èèna kahèi miu dènge dhèu aa'i-aa'i ra asa pasue, sèmi dhu ji'i sue miu.

¹³ Dènge sèmi èèna Lamatua pa'èra d'ara miu, ho mamuri mola dènge mera-milu, toke bèli-camèd'a Lamatua Yesus lèpa hari mai dènge dhèu unu Na, miu bisa titu kahèi ètu katanga madha Ama Lamatua èdhi, dènge dui heka sasala-sasigo.

4

J'ara mamuri dhu pamaho'o d'ara Ama Lamatua

¹ De a'ari, sèmi ne'e ka! Ji'i pamako miu sèna ka miu mamuri pamaho'o d'ara Ama Lamatua, sèmi dhu ji'i aj'a le miu. Mema mamuri miu madhutu le j'ara sèra aa'i-aa'i, te ngaa lula èdhi j'aj'i le dhèu unu Lamatua Yesus, ka ji'i manèngi miu ho tenge j'ara dhu be'a risi hari.

² Miu aa'i-aa'i mi me'a le ngaa dhu ji'i aj'a miu, pake koasa nèti Lamatua Yesus.

³ Dad'èi Ama Lamatua nuka: mamuri mola-mèci! Baku mamuri kaj'alu ètu d'ara pa'èci bhèni-mone.

4 Miu hud'i me'a lalau ngi'u miu unu mi, sèna ka mamuri mola-mèci ho dhèu pakab'ua miu.*

5 Baku mamuri madhutu dad'èi d'ara mi, sèmi dhèu dhu dhae tadhe mèka Ama Lamatua.

6 Mage abhu dhèu dhu neo tao karehe, aa neo tenge oto dhu risi nèti dhèu dhu sama-sama parcaya Ama Lamatua. Te Ama Lamatua ka, Kètu dhu èèna na b'ala bhabhelu-katub'a aa'i-aa'i sèra. J'ara se'e, ji'i peka le dènge miu pèri-pèri hari, aa pasanèd'e le miu karèi nèti uru ka.

7 Te Ama Lamatua paroa nare le èdhi sèna ka j'aj'i mi dhèu unu Na. Madhutu dad'èi Na, èdhi hud'i mamuri dènge mola-mèci, baku dènge kaj'alu, sèmi dhèu dhu tao j'ara makae. Baku sèmi èèna!

8 Nèti èèna ka, dhèu cee ka dhu madhutu boe lii holo-nori ne, nèngu èèna sèmi boe ji'i, aa tule eele Ama Lamatua kahèi dhu hia le miu Roh Na dhu Mola-Mèci.

9 Madhutu ngangee ja'a, suri hari ia ka hia miu j'ara-j'ara pasue a'ari dènge a'ari, lula Ama Lamatua mesa Na ka dhu peka le, na, miu hud'i pasue ku èci dènge èci.

10 Ji'i tadèngi le, miu sue a'ari aa'i-aa'i ètu propensi Makedonia nèi. Te ngaa a'ari aa'i-aa'i! Ji'i manèngi sèna ka miu sue dhèu leo risi eele hari.

11 Tenge j'ara sèna ka miu mamuri dènge mera-milu. Baku soro iisi sa d'ara lii langu

* 4:4 Lii Yunani peka na, "Miu èci-èci ka hud'i me'a lalau 'era kanata' miu unu mi." 'Era kanata' ètu nèi, sasoa na bisa 'ngi'u aae' do 'ngi'u (diri)'. Abhu kahèi dhu peka na, ètu ayat ne'e, 'era kanata' sasoa na, 'dhèu èmu'. Ladhe sèmi èèna, sasoa ayat ne, peka na, "Mamuri mola dènge dhèu èmu èu".

dhèu leo, te ngaa èci-èci ka laladhe mamuri na. Miu hud'i sab'a tenge nganga'a-nganginu dènge kacui-aa' miu mesa mi. Baku maena dhèu leo. Se'e se ji'i pasanèd'e le miu, karèi nèti uru ka.

¹² Ladhe miu mamuri sèmi èèna, miu pabia boe dhèu leo. Ladhe dhèu dhu lèka boe Kristus rèdhi miu mamuri sèmi èèna, tatu ra peka na, “Waa! Dhèu dhu madhutu Lamatua Yesus sèra, mamuri ra mola tare'a, nga!”

Mamai hari Lamatua Yesus

¹³ A'ari! Limuri ne, ja'a neo peka ngaa èci, sèna ka miu me'a mèu, j'ara-j'ara lula-nèti dhèu madhe. Èdhi te'a, na, dhèu dhu madhe le, bèli-camèd'a, na mamuri hari. De ladhe nèti dhèu unu Lamatua èci madhe, miu baku tao ngi'u mi j'èra nuka sèmi dhèu leo dhu re'a boe j'ara èèna.

¹⁴ Te èdhi te'a, na, Yesus dhu madhe le, ka Ama Lamatua pamamuri hari Ne. De ladhe sèmi èèna, tatu Ama Lamatua pamamuri hari kahèi dhèu parcaya dhu madhe sèra, aa oru nare si aa'i-aa'i ra bera-bera dènge Lamatua Yesus.

¹⁵⁻¹⁷ De ladhe Lamatua Yesus mai hari, Na puru nèti sorga asa rai-haha ne, èèna na dènge paredha dhu lii mèdhu aae. Ka kètu kapai nèti ana-ana pajuu ètu sorga hia paredha ho tiu tèbhe. Hèia dhèu unu Lamatua dhu madhe sèra, mamuri hari. Ka rèngu dènge èdhi dhu mamuri era, lèke ded'e asa ra'i-liru, ho aa'i-aa'i ti soru mamai Lamatua Yesus. Èle èèna na, èdhi aa'i-aa'i ti mamuri pa'èci dènge Ne taa-taa.*

Mi nanene pabe'a-be'a, lula ngaa dhu ji'i peka ne, Lamatua unu Na ka dhu peka-padhahai.

* 4:15-17 1 Korintus 15:51-52

¹⁸ De ladhe sèmi èèna, miu hud'i pa'èki lii aj'a-nori ne, sèna ka pa'èra d'ara miu èci dènge èci.

5

Pa'èra ho sèmi mamai Lamatua

¹ De a'ari aa'i-aa'i! Ji'i suri ia ka laa, peka na, mamai Lamatua lèke hake pèri, do tanggal pèri.

² Lula miu aa'i-aa'i mi me'a, na, mamai Na dènge sahèka, sèmi dhèu mana'u dhu mai re mèda.✧

³ Lod'o èèna, dhèu ae dhu madhèdi mau-mau, te ngaa cag'ag'a laa paraga dènge j'aj'èra. Mamai Na sama kahèi dènge dhèu bhèni dhu cag'ag'a laa kabake pèd'a neo nara iisi. Ladhe paraga le j'ara ne'e, èdhi pakaj'èu iisi tasamia hari! Èci èèna ka dènge mamai Lamatua.

⁴⁻⁶ A'ari aa'i-aa'i! Mage dhoka mamai Na nuka sèmi dhèu mana'u dhu mai re talora mèda, lèke dènge miu dhu bhèj'i luu. Mage lèke miu sèmi èèna kahèi! Èdhi mamuri heka ètu d'ara maroga, sèmi dhèu leo dhu bhèj'i luu era. De èdhi dhu lèka le Lamatua Yesus, mamuri le ètu d'ara saraa, ti pa'èra soru mamai Ne, aa j'aga paie mamuri èdhi. J'ara se'e aa'i-aa'i miu me'a le!

⁷ Te dhèu dhu bhèj'i, na, bhèj'i re mèda. Aa dhèu dhu mahu, na, mahu re mèda.

⁸ Te ngaa miu baku sèmi èèna, lula èdhi dhu mamuri le ètu d'ara saraa. Miu hud'i j'aga paie mamuri miu. Ladhe miu percaya taruu Lamatua aa mamuri pasue, èèna sama sèmi sordad'u dhu pake kodho bèsi dhu pa'abhe kakara. Aa ladhe

✧ 5:2 Mateos 24:43, Lukas 12:39, 2 Petrus 3:10

miu maena taruu mi Lamatua Yesus dhu hia miu pakaj'èu nèti nanasa Ama Lamatua, èci èèna ka dènge sordad'u dhu pa'abhe kètu na dènge solo bèsi.✧

⁹ Ama Lamatua hag'e boe èdhi ho Na huku ti. Te ngaa Na hag'e èdhi sèna ka abhu mamuri, sad'i èdhi lèka Kètu èdhi, Yesus Kristus.

¹⁰ Te Na madhe le gati èdhi. De ladhe Na lèpa hari mai, èdhi mamuri taa-taa dènge Ne, masi ka èdhi madhe le, do mamuri era.

¹¹ Nèti èèna ka, pake lii-lii ja'a se'e, sèna ka hia karej'e dènge pa'èra èci dènge èci, sèmi dhu miu tao le karèi nèti uru èèna ka.

Paulus aj'a-nori dhèu sarani ètu Tesalonika

¹² A'ari aa'i-aa'i! Sanèd'e ho pakab'ua ina-ama dhu j'aj'i kètu ètu juma'at. Te rèngu sèra sab'a dhu re'a boe j'èra hia miu, aa pasanèd'e miu, sèna ka miu baku manahu asa d'ara sasala.

¹³ Pad'elo sasue miu dènge ra, sèna ka re'a, na, miu pakab'ua si, lula rèngu sab'a bia hia miu. Mamuri dame èci dènge èci.

¹⁴ A'ari aa'i-aa'i! Abhu pèri-pèri j'ara era dhu ji'i neo pasanèd'e miu: dhèu dhu bai-eed'a sèra, peka si sèna ka ra sab'a dènge d'ara maj'èni. Dhu d'ara roe, pa'èra si. Dhu haha, sarimu mere si. Taha d'ara aa lii mako mi dhèu aa'i-aa'i ra.

¹⁵ Sanèd'e, bhabhelu baku b'ala dènge bhabhelu. Te ngaa tenge j'ara sèna ka tao be'a dènge dhèu aa'i-aa'i ra. Baku tao be'a dhoka dènge dhèu èdhi di, te ngaa dènge dhèu leo kara kahèi.

¹⁶ Pakarej'e d'ara taruu.

¹⁷ Sabaj'a mèu-mèda.

✧ 5:8 Yesaya 59:17, Epesus 6:13-17

18 Sad'i paraga dènge ngaa èèna ka, j'aj'èra, do karej'e-karae, manèngi makasi mi Lamatua. Te Ama Lamatua d'èi dhèu aa'i-aa'i dhu madhutu Yesus Kristus tao sèmi èèna.

19 Baku magee sasab'a Roh Lamatua.

20 Ladhe abhu ca dhèu nèti talora dhèu par-caya dhu peka na, nèngu abhu le lii moa nèti Ama Lamatua, mage miu pusi-pahae boe lii padhai na!

21 Te ngaa miu hud'i kanucu ku paie-iie lii èèna mai tare'a nèti Lamatua, do aad'o. Ladhe tare'a, na, madhutu.

22 Te ngaa pakaj'èu nèti ngaa-ngaa dhu karehe.

Paulus pa'èle sasuri na

23-24 Ja'a sabaj'a manèngi Ama Lamatua ho pamèu d'ara dènge mamuri miu aa'i-aa'i mi. Nèngu èèna ka dhu uri ho èdhi bisa mamuri dame èci dènge èci. Dènge j'ara sèmi èèna, ladhe d'ai lod'o mamai hari Lamatua èdhi, Yesus Kristus, miu bisa titu ètu katanga madha Na dènge ngi'u aae miu, d'ara miu, dènge samanga miu dhu dènge boe sasala ngaa-ngaa. J'ara na sèmi èèna ka! Te Lamatua Yesus dhu paroa miu j'aj'i dhèu unu Na, dhu monya boe. Ngaa dhu Na peka, Na tao madhutu sama sèmi èèna ka. De èèna na, Na lere nèti miu dènge mola-mèci asa katanga madha Ama Lamatua.

25 A'ari aa'i-aa'i! Baku bhèlu manèngi-mangaj'i hia ji'i ètu ne'e.

26 Ja'a manèngi sèna ka miu hia lii maho'o ji'i kahèi mi dhèu sarani aa'i-aa'i ètu sèra!

²⁷ Ja'a manèngi dènge kolongara Lamatua Yesus, ho miu baca hia juma'at aa'i-aa'i ra isi sasuri ja'a ne.

²⁸ Ja'a manèngi sèna ka Kètu èdhi, Yesus Kristus, pad'elo d'ara hua iia Na mi dedha miu aa'i-aa'i mi.

D'ai sange ne'e ka.

Saloom,
Paulus

Dhao Alkitab
Genesis and the New Testament in the Dhao
language of Indonesia
Kejadian dan Perjanjian Baru dalam bahasa Dhao
copyright © 2012 Unit Bahasa dan Budaya

Language: Dhao

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 18 Apr 2025 from source files dated 31 Aug 2023

526bd1ea-5f35-574c-9a7a-dabc714cb5d3